

# Ils Scumbigls grischuns, part 2

## François Annibal d'Estrées

\* 1573, † 5 da matg 1670 a Paris. Uvestg da Noyon (Picardia) 1594. Enconuscent era sut il num Marquis de Coëuvres, è el s'engaschà en sia funcziun d'ambassador franzos extraordinari a Roma (1619–22) e tar ils Confederads e Grischuns (1624–27) per la restituziun da la Vuclina als Grischuns. Pli tard è el stà ambassador a Vaniescha ed il 1636–48 puspè a Roma. Litinent general da las truppas franzosas (1624–27) ch'han liberà la Vuclina da la garnischun papala. Marschal da la Frantscha 1627. Durant ils Scumbigls grischuns ha el candidà il 1634, senza success, cunter il duca Henri de Rohan per il commando suprem da la truppa d'expediziun franzosa en il Grischun. Aderent dal cardinal Richelieu. Las fermezzas dad Estrées eran plitost en il sectur militar ch'èn quel diplomatic. *Silvio Margadant*

## Contract da Monzon (1626)

Il Contract da Monzon, signà tranter la Spagna e la Frantscha il 5 da mars 1626, aveva il scopo da neutralisar la Vuclina ch'era vegnida occupada durant ils Scumbigls grischuns, ensemen cun il territori da las Trais Lias, da truppas spagnolas ed austriacas suenter la sullevaziun dals subdits grischuns il 1620. L'atun 1624 ha il cardinal Richelieu, ch'aveva surpiglià la pussanza en Frantscha a l'entschatta dal 1624 e che proseguiva ina politica exteriura antihabsburgaisa, tramess truppas franzosas sut il cumond dal general François Annibal d'Estrées a «liberar» las Trais Lias e la Vuclina. Intimada unicamain da la raschun da stadi, è la Frantscha puspè s'avischinada a la Spagna, cun la quala ella ha concludì il 1626 il Contract da Monzon, senza consultar ils Grischuns. Quest contract ha apparentamain restabilì il domini da las Trais Lias sur la Vuclina, obligond ils Vuclinais da pajar in tribut als Grischuns, ma s'negond a quests ultims tutta preschientscha militar e politica en Vuclina. Als Vuclinais era concedì da nominar en atgna cumpetenzia lur autoritads. Truppas papalas occupavan la val. Il contract, che n'era betg vegnì renconuschì dals Grischuns, è restà en vigur fin il 1629. *Martin Bundi*


## Henri de Rohan

\* 21 d'avust 1579 a Blain (Bretagna), † 13 d'avrigl 1638 a Königfelden (vischianza da Windisch/AG), sepulì en la catedrala da Saint-Pierre a Genevra, protestant. Figl da René, vicomte de Rohan, e da Catherine nata de Parthenay. Duca e pair de

France 1603. ∞ 1605 Marguerite nata de Béthune, figlia da Maximilian, duca de Sully. Colonel dals Svizzers e dals Grischuns en servetsch da la Frantscha 1605–14. Rohan è stà in dals manaders da la partida ughenotta suenter la mort da Henri IV 1610 e ses chau militar durant las guerras dals onns 1620. Suenter la Pasch d'Alès (28 da zercladur 1629), è el entrà en servetsch da Vaniescha il 1629–31. Il december 1631 è el vegnì tschernì da las Trais Lias sco general da lur milissas, Louis XIII ha alura numnà el ambassador extraordinari en Svizra ed en il Grischun. Sco litinent general en Rezia (schaner 1632 fin schaner 1633, fanadur 1633 fin mars 1637), è el vegnì incumbensà duas giadas cun ina missiun extraordinaria en Svizra il 1633, tranter auter per dumandar a la Dieta confederala il dretg da passadi e quel da recrutar truppas militaras. Rohan ha alura scrit a Turitg ses «Traité du gouvernement des treize cantons». Il 1635, suenter ina campagna en l'Alsazia, ha el traversà la Svizra per occupar la Vuclina; durant ina guerra en las muntognas manada cun grond inschign, ha el battì cun il sustegn da regiments svizzers en servetsch da la Frantscha l'armada imperiala, alura quella spagnola. La politica da Richelieu, che retardava la restituziun da la Vuclina a las Trais Lias, ha incità exponents politics e militars grischuns, unids en la Lia da la chadaina, da sa revoltar. Il mars 1637 ha Rohan stui capitular e la Frantscha ha stui evacuar sias truppas. Crudà en disgrazia, è el fugì per intgins mais a Genevra, alura ha el cuntanschì l'armada cumandada da Bernhard von Sachsen-Weimar ed è vegnì blessà grevmain durant l'assedi da Rheinfelden (favrer 1638). En sias memorias (publitgadas il 1644), relata Rohan spezialmain da la guerra en Vuclina. *Lucienne Hubler*

## Ulysses von Salis (Marschllins)

\* 23 da fanadur 1594 a Crusch, † 3 da favrer 1674 ad Eigias, reformà, da Crusch ed Eigias. Figl da Hercules. Frar da Carl e da Rudolf. ∞ 1612 Violanta nata von Salis, figlia da Johann Baptista, dr. iur. Progenitur da la lingia Salis-Marschllins. Il 1606 ha Salis accumpagnà dus frars pli vegls per studis a Heidelberg. Suenter segiurns a Paris ed Orléans è el stà activ fin il 1611 sco pagi en servetschs dal duca da Bouillon. Sco aderent dirigent da la partida venezian-franzosa durant ils Scumbigls grischuns è el stà, a partir dal 1616, chapitani en servetschs venezians; maior sergent en l'armada dal cont Ernst von



Las Terras subditas dal Grischun furmavan la colliaziun directa tranter ils territoris aliads da la Spagna e da l'Austria. (CHARTA: LIR)

Mansfeld (1621–22) e litinent colonel en il regiment franzos da ses frar Rudolf (1624) ch'el ha surpiglià il 1625 suenter la mort da quel (schlià il 1627). Per recumpensa ha Salis obtegnì la cumpagnia da la guardia svizra da la Frantscha. A partir dal 1631 ha el manà sco colonel in regiment grischun, cun il qual el ha participà en ils onns 1635–37 a la campagna victoriosa dal duca franzos Henri de Rohan en Vuclina. Cura ch'ina part dals Grischuns alliads en la Lia da la chadaina è s'opponida il 1637 a Rohan, ha Salis refusà invanmain da rumir il chastè a Clavenna. Suenter la retirada da Rohan è el restà, sco in dals paucs uffiziers grischuns, fidaivel als Franzos, ha cumbatti en la Flandra il 1638, è vegnì numnà feldmarschal il 1641 ed ha preni part ad ulteriuras campagnas en l'Italia.

Salis ha transfurmà in ina fortezza en ruina a Marschllins, acquistada il 1633, en in chastè nua ch'el è sa domicilià il 1643 suenter 27 onns servetsch militar, daventond ina da las personalitads las pli influentas dal Grischun. Il medem onn ha el sustegnì ils cumins dal Partenz en il cumbat cunter ils privilegis da Tavau en la Lia da las Diesch Dretgiras (Sentenzia da Waser). Sco manader da la partida franzosa renaschida ha el pretendì la liberaziun dals dretgs austriacs en la Lia da las Diesch Dretgiras. El è stà landamma da la dretgira dals Quatter Vitgs e chau da la Lia da las Diesch Dretgiras 1646–47. *Silvio Färber*

## Lia da la chadaina (1637)

Lia secreta constituida a l'epoca dals Scumbigls grischuns. En il Contract da Clavenna dals 7 da favrer 1636 aveva il duca Henri de Rohan offert als Grischuns la restituziun da la Vuclina sut la cundiziun ch'els desistian da la giurisdiziun e renunzian a l'admissiun da la creta reformada en Vuclina. Quai era vegnì acceptà cun gronda disfidanza envers la Frantscha. Il november 1636 han Meinrad Buol, Gieri Genatsch e Hans Schorsch tractà cun l'Austria e la Spagna a Puntina. Da questa «intriga patriotica» è sortì il disgrazià Contract da Puntina dals 7 da schaner 1637 (signà ils 17 da schaner 1637 a Milaun). Sco in dals diplomats responsabels ha Genatsch reagì immediat, unind clandestinmain 31 uffiziers ed umens da stadi grischuns en l'uschenumnada Lia da la chadaina, fundada ils 6 da favrer 1637 en la chasa da Gregor Meyer, burgamester da Cuira. Genatsch sez n'ha dentant betg fatg part da quella lia che vuleva bandischar ils Franzos e reconquistar la Vuclina cun agid da la Spagna. Ils 21 da mars 1637 ha Genatsch, colonel e confident dal duca de Rohan, tschinclà cun 3000 umens la

Rohanschanze sper Landquart. Tradi, ha Rohan capitulà ils 26 da mars, ed ils 5 da matg è el vegnì congedià a Cuira cun tut las onurs ch'in ami dal Grischun merita. Tras la dretgira nauscha dal 1659 han ils cumins renconuschì la necessitad da la Lia da la chadaina ch'els han legitimà ex post ensemen cun ils congiurads. *Adolf Collenberg*

## Gieri Genatsch [Jörg Jenatsch]

\* 1596 a Lon u en l'Engiadin'Ota, † 24/25 da schaner 1639 a Cuira, reformà, a partir dal 1635 catolic, da Samedan. Figl dad Israel, plevon e notar, e dad Ursina nata Balsamin. ∞ 1) ca. 1619 Katharina nata Buol, 2) 1627 Anna nata Buol. Genatsch ha passentà sia giuventetgna a Silvaplana. Studi da teologia a Turitg 1612–16 ed a Basilea 1616–17. Recepti en la Sinoda retica 1617. Plevon a Scharons 1617–18 ed a Berbenno en Vuclina 1618–20 che sa chattava al cunfin confessional. Il 1618 è Genatsch stà in dals promoturs da la dretgira nauscha da Tusaun, instituida cunter la partida spagnola. Il 1620 ha el pudì mitschar mo per pauc cun sia famiglia a la revolta prurta en Vuclina cunter ils Grischuns reformads. El ha alura barattà la Bibla cun la spada, è aderi a la partida veneziana dominada dals Salis ed è sa participà, per incumbensa da quels, als assassinats da Pompejus Planta e d'auters partisans da la Spagna. Il 1622 è el stà chapitani en servetsch dal cont von Mansfeld ed è alura avanzà en servetsch venezian al colonel. Il 1624 ed il 1635 è el sa participà en servetsch franzos a la reconquista da la Vuclina. Cun quai che la Frantscha na pareva dentant betg da vulair restituir las Terras subditas als Grischuns ed era en pli en retard cun ils pajaments dals solds, è Genatsch sa participà a contractivas clandestinas cun ils Habsburgais, malgrà ch'el era in stretg confident dal duca de Rohan. Cuntrari a sia famiglia, è el convertì il 1635 al catolicissem. Il 1637 è el stà a la testa da la revolta ch'ha manà a l'expulsiun dals Franzos da la Vuclina e dal Grischun (Lia da la chadaina). Durant ina notg da tschaiver dal 1639 è Genatsch vegnì assassinà sut circumstanzas anc oz betg scleridas dal tutfatg en in'ustaria da Cuira ed è vegnì sepulì il medem di en la catedrala da Cuira. Damai ch'els potentats da quel temp n'avevan nagin interess d'eruir ils culpabels maindir lur instigaturs, è il murraretsch vegnì examinà mo a moda fitg superfiziala. Entant che l'istoriografia dal 17avel fin 19avel tschientaner è s'occupada a moda critica da Genatsch e n'ha betg attribui ad el in'impurtanza particulara en confront cun ils auters protagonistas dal temp, ha Conrad Ferdinand Meyer

transfurmà el en ses roman «Jürg Jenatsch» en ina figura eroica, simbol dal cumbat dals Grischuns per la libertad e l'indipendenza ch'èn era ils elements centrals dal roman «La historia dil Gieri Genatsch» (1929) da Pader Maurus Carnot. Per Meyer eri dentant evident ch'il Genatsch litterar sa distingueva da la figura istorica. Il 1876 ha el scrit ad in ami en quest connex il suandant: «J'ai la certitude que ce n'était qu'un coquin, et j'en ai fait un personnage.» A l'entschatta dal 20avel tschientaner è Genatsch daventà successivmain il nov erox dal Grischun. Dapi ils onns 1960 s'occupa però l'istoriografia puspè a moda pli critica da Genatsch. Ella caracterisescha el sco figura barocca tipica per l'epoca per quai che riguarda ses pensar ed agir, sco arrivist animà da sias ambiziuns e passius e sco opportunist senza ils minimis scrupels. Quai s'exprima era en il film «Jenatsch» (1987) da Daniel Schmid. *Silvio Färber*

## Johann Rudolf Travers (von Ortenstein)


\* tranter il 1585 ed il 1594, † suenter ils 11 da zercladur 1642 a Tumeagl, reformà, probablmain convertì al catolicissem, da Zuoz. Figl da Johann, uffizier, e da Lucrezia nata von Schauenstein, figlia da Rudolf. Frar da Johann Victor (\*1582). ∞ Catarina nata von Planta, figlia da Pompejus von Planta. Travers è daventà qua tras era cumproprietari dal chastè da Rapertg. Suenter studis a Dillingen (Baviera) en servetsch militar franzos 1614–32. Derschader a la dretgira nauscha da Cuira dal 1620. Il 1624 è Travers vegnì delegà da las Trais Lias (ensemen cun Jakob Schmid von Grünneck) a la Dieta confederala a Soloturn per negoziar davart pensius, la Vuclina ed il Contract da Madrid (davart quel ha el tractà ina segunda giada persul cun il Marquis de Coëuvres il 1627). Il 1635 è el stà litinent colonel sut il duca de Rohan en Vuclina (regiment da Schauenstein, alura da Salis-Marschllins), participà a la congiuraziun cunter Rohan, senza esser stà cunmember da la Lia da la chadaina (cuntrari a ses frar Johann Victor). Il 1639 ha Travers tractà sco delegà dal Stadi da las Trais Lias l'Emprim Capitulat da Milaun. Suenter avoir quità il servetsch franzos, è el entrà cun in agen regiment en servetsch da la Spagna-Milaun. Travers è stà, sper Gieri Genatsch, in dals umens da stadi pli pussants engaschads per la partida spagnol-austriaca vers la fin dals onns 1630 ed el è stà a maisa cun Genatsch la saira dal murraretsch da quel ils 24 da schaner 1639 a Cuira. *Adolf Collenberg*

## Capitulats da Milaun

Il term Capitulats da Milaun designescha il contract dal 1639 per la restituziun da las Terras subditas (Vuclina, Buorm e Clavenna) a las Trais Lias e sias renovaziuns en vigur a partir dal 1726 e 1763. En il Capitulat da Milaun dal 1639 ha la Spagna, che exercitava la suveranità sur la Lombardia, cedi suenter ils Scumbigls grischuns la supremazia sur las Terras subditas, a las qualas ella ha però garanti l'exclusività da la confessiun catolica. En la Pasch eterna cun la Spagna, colliada stretgmain cun la cunvegna davart las Terras subditas, è vegnìs fixads ils dretgs da passagi da truppas habsburgaisas sur ils pass grischuns e regladas dumondas da pensius e da privilegis commerzials. *Max Hilfiker*

## Lexicon Istoric Retic

Il LIR cumpiglia bundant 3100 artigels (geografics, tematics, artigels da familias e biografias) davart l'istoria grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.



Gieri Genatsch (1596–1639) – figura istorica ed erox naziunal dal 19avel e 20avel tschientaner.